

每週經課朗誦經文（巴克禮台語漢字）2012/03/04

共同經課-1 創世記十七章一節～七節，十五節～十六節

1 亞伯蘭九十九歲的時，耶和華對亞伯蘭顯現，給伊講：「我是全能的上帝。你佇我的面前行做著完全，2 我欲及你立我的約，互你的後裔極其多。」3 亞伯蘭就仆落佇地裡；上帝閣及伊講話，講：4 「我及你立我的約：你欲做多多國的父。5 對今以後，你的名無閣叫做亞伯蘭，是欲叫做亞伯拉罕，因為我已經立你做多多國的父。6 我欲互你的後裔極其多；國度對你來立，君王對你來出。7 我欲及你以及你歷代的後裔設立我的約，做永遠的約，是欲做你及你的後裔的上帝。15 上帝閣對亞伯拉罕講：「你的某撒萊姆通閣叫伊的名撒萊，伊的名欲叫做撒拉。16 我欲賜福伊，我亦欲互你對伊得著一個子。我欲賜福伊，伊亦欲做列國的老母；欲有邦國的王對伊出。」

共同經課-2 詩篇二十二篇二十三節～三十一節

23 恁驚畏耶和華者著謳佬伊！雅各的後裔攏著榮光伊！以色列的後裔攏著敬畏伊！24 因為伊無看輕，亦無厭賤困苦人的困苦，亦無對伊掩面；伊求叫伊的時，伊就聽伊。25 我佇大聚會的中間所謳佬者是對你來；我欲佇驚畏伊的人的面前謝我的願。26 謙卑的人欲得著食飽；尋耶和華的人欲謳佬伊。願恁的心活到永遠！27 地的極頭攏欲數念，來歸順耶和華；列邦的萬族攏欲敬拜佇你的面前。28 因為國是耶和華的；伊是萬國的主宰。29 地上一切好漢的人欲飲食來敬拜；見若歸土的人——袂會保全生命者——攏欲仆拜佇伊的面前。30 有後裔欲服事伊；主的代誌欲傳佇後代。31 in 欲來亦欲傳伊的公義互得欲出世的百姓，知此個事是伊做的。

共同經課-3 羅馬書四章十三節～二十五節

13 因為所應允亞伯拉罕及伊的後裔做後嗣承接世間的，毋是對律法，是對信的義。14 因為若屬律法的做後嗣，信就歸佇空空，應允也廢無。15 因為律法是致到受氣；若無律法，就無犯著。16 所以是對信，通照恩典，欲互應允堅固佇眾後裔；毋若佇彼個屬律法的，也佇屬亞伯拉罕的信的。17 伊佇伊所信的上帝的面前做咱眾人的父，就是彼個互死人復活，叫許個無者那親像有者的上帝；照所記載講：「我設立你做多多邦國的父。」18 伊佇無通向望的中間，對向望來信，互伊通成做多多邦國的父，照所曾講的：「你的後裔欲親像我呢。」19 伊想著家己的身軀親像已經死，（彼時成百歲），閣撒拉的胎孕已經絕，伊的信無軟苳；20 伊看上帝的應允，也無對毋信來僥疑，信就愈勇健，來歸榮光上帝，21 閣深信上帝會成伊所應允的。22 所以，給伊算做義。23 今所講「給伊算」，此句毋是干單為著伊來寫，24 也是為著咱，咱若信靠彼個互咱的主耶穌對死人中復活的上帝，也欲給咱算做義。25 耶穌曾為著咱的罪，受解送；閣為著咱的稱做義，來得著復活。

共同經課-4 馬可福音八章三十一節～三十八節

31 就教示 in 講：「人子的確著受多多苦楚，互諸個長老、祭司頭、經學士棄揀，閣受害死，過三日就復活。」32 耶穌用此個話明明給 in 講，彼得牽來責備伊。33 若是伊越轉身，看伊的學生，就責備彼得講：「撒但，退去我的後面！因為你所想毋是上帝的事，是人的事。」34 就叫眾人及伊的學生來，給 in 講：「若有人愛隨我，就著看無家己，夯伊的十字架來隨我。35 因為，見若愛救伊的生命的，欲失落伊；見若為著我及福音來失落伊的生命的，欲救伊。36 人若得著全世界，來喪失伊的生命，有甚麼利益？37 因為人欲出甚麼來對換伊的生命？38 凡若佇此個姦淫有罪的世代，掠我及我的話做見誚的，人子用父的榮光，及諸個聖的天使來的時，也欲掠伊做見誚。」